

ԿԱՐԾԻՔ

ՊԱՇՏՈՆԱԿԱՆ ԸՆԴԴԻՄԱԽՈՍԻ

ՀԱՅԱՍՏԱՆԻ ԱԶԳԱՅԻՆ ԱԳՐԱՐԱՅԻՆ ՀԱՄԱԼՍԱՐԱՆԻ ԱՍՊԻՐԱՆՏ ԶԱՐՄԻԿ ՎԱՀԱՆԻ ՄԵԼԻՔՅԱՆԻ «ՆԵՐԴՐՈՒՄԱՅԻՆ ՄԻԶՎԱՅՐԻ ԲԱՐԵԼԱՎՄԱՆ ՀԻՄՆԱԽՆԴԻՐՆԵՐԸ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՄՆՆԴԱՐԴՅՈՒՆԱԲԵՐՈՒԹՅԱՆ ՈԼՈՐՏՈՒՄ» ԹԵՄԱՅՈՎ ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ, ՆԵՐԿԱՅԱՅՎԱԾ Ը.00.02 - «ՏՆՏԵՍՈՒԹՅԱՆ, ՆՐԱ ՈԼՈՐՏՆԵՐԻ ՏՆՏԵՍԱԳԻՏՈՒԹՅՈՒՆ ԵՎ ԿԱՌԱՎԱՐՈՒՄ» ՄԱՍՆԱԳԻՏՈՒԹՅԱՄԲ ՏՆՏԵՍԱԳԻՏՈՒԹՅԱՆ ԹԵԿՆԱԾՈՒԻ ԳԻՏԱԿԱՆ ԱՍՏԻՃԱՆԻ ՀԱՅՑՄԱՆ ՀԱՄԱՐ

ԱՏԵՆԱԽՈՍՈՒԹՅԱՆ ԹԵՄԱՅԻ ԱՐԴԻԱԿԱՆՈՒԹՅՈՒՆԸ

Մանդարդյունաբերությունը Հայաստանի Հանրապետության տնտեսության խոշորագույն ճյուղերից մեկն է, որի նպատակն է բավարարել բնակչությանը որակյալ սննդամթերքով: Մանդարդյունաբերության ոլորտում ներդրումների ընդլայնումը նպաստում է երկրի պարենային անվտանգության ապահովմանը և բնակչության առաջնային պահանջմունքների բավարարմանը: Ուսումնասիրությունները ցույց են տալիս, որ սննդի արտադրության ոլորտում իրականացված օտարերկրյա և մասնավոր ներդրումների ծավալը բավականին փոքր է և զգալիորեն զիջում է էներգետիկայի, հանքարդյունաբերության, հեռահաղորդակցության և մի շարք այլ ոլորտներում իրականացվող ներդրումների ծավալներին: Չնայած այս հանգամանքին, ակնհայտ է, որ սննդարդյունաբերության ոլորտը Հայաստանի տնտեսության համար բարձր կարևորություն ներկայացնելուց բացի ունի նաև բավականին մեծ տնտեսական ներուժ: Ելնելով վերոնշյալից, կարելի է եզրակացնել, որ Զարմիկ Մելիքյանի ատենախոսության թեման արդիական է:

Հետազոտության հիմնական նպատակն է՝ ներկայացնել ՀՀ սննդարդյունաբերության ոլորտում ներդրումային միջավայրի բարելավման ուղիները, որոնք կնպաստեն ներդրումային ոլորտային ծրագրերի արդյունավետ կառավարմանը և ներդրումների գծով հիմնավոր կառավարչական որոշումների կայացմանը: Նշված նպատակի իրագործմանն են ուղղվում հետևյալ հիմնական խնդիրները.

- բացահայտել սննդարդյունաբերության զարգացման ռազմավարությունից բխող ՀՀ ներդրումային միջավայրի բարելավման ուղիները, վերհանել մրցակցային ներդրումային գործունեության հնարավորությունները սննդարդյունաբերության ոլորտում,

- դասակարգել սննդարդյունաբերության ներդրումային միջավայրի ձևավորման վրա ազդող գործոնները ըստ ներդրումային գործունեության վրա ներազդեցության աստիճանի,

- մշակել ներդրումային ծրագրերի վարկանիշավորման համակարգ, հնարավորություն ստեղծելով ներդրումային միջավայրը ձևավորող բաղադրիչների գնահատման արդյունքում բացահայտելու ներդրումային ուղղությունների գերակայությունները սննդարդյունաբերության ոլորտում,

- մշակել սննդարդյունաբերության ոլորտի ներդրումային ռիսկերի կառավարման կառուցակարգ, ուղղված ներդրումային ծրագրերի իրականացման արդյունքում առաջացող հավանական վնասների գնահատմանը և վերահսկմանը,

- հիմնավորել սննդարդյունաբերության ոլորտի ներդրումային միջավայրի կառավարման հայեցակարգային մոտեցումներ, հիմնված ոչ միայն ներդրումների ֆինանսատնտեսական հատույցի, այլև այդ գործընթացին առնչվող ներքին ու արտաքին շահառուների սոցիալ-տնտեսական սպասումների վրա:

Ատենախոսությունը բաղկացած է առաջաբանից, երեք գլխից, եզրակացություններից, օգտագործված գրականության ցանկից և հավելվածներից, այն ընդգրկում է 32 գծապատկեր և 16 աղյուսակ: Ատենախոսությունը շարադրված է 128 էջի վրա՝ ներառյալ օգտագործված գրականության ցանկը:

ԱՏԵՆԱԽՈՍՈՒԹՅԱՆ ՀԻՄՆԱԿԱՆ ԲՈՎԱՆԴԱԿՈՒԹՅՈՒՆԸ

Աշխատանքի առաջաբանում հիմնավորվել է թեմայի արդիականությունը, ներկայացվել է հետազոտության նպատակն ու խնդիրները, օբյեկտն ու առարկան, տեսական, տեսամեթոդաբանական և տեղեկատվական հիմքերը, գիտական նորույթն ու արդյունքները, դրանց գործնական նշանակությունը, փորձարկումն ու հրապարակումները, հետազոտության ծավալն ու կառուցվածքը:

Ատենախոսության առաջին՝ «Ներդրումային միջավայրի ձևավորումը Հայաստանի Հանրապետության սննդարդյունաբերության ոլորտում» գլխում վերլուծվում է Հայաստանի Հանրապետության ներդրումային միջավայրի գրավչության աստիճանը սննդարդյունաբերության ոլորտում, ուսումնասիրվել են ոլորտի առանձնահատկությունները: Առաջին գլխի առաջին բաժնում հեղինակը ներկայացրել է Հայաստանի սննդարդյունաբերության ոլորտի ռազմավարական զարգացման միտումները և օտարերկրյա ներդրումները, ուսումնասիրել է ՀՀ վերամշակող արդյունաբերության կառուցվածքը, վերլուծել է սննդամթերքի արտադրության ծավալները և շարժընթացը:

Նույն գլխի 2-րդ բաժինը վերնագրված է «Հայաստանի ներդրումային միջավայրի գրավչությունը և գնահատման մոտեցումները»: Այս բաժնում ներկայացվում է ներդրումային միջավայրի կառուցվածքը, ուսումնասիրվում է Հայաստանի ներդրումային միջավայրի գրավչությունը և դիրքը համաշխարհային տնտեսությունում: Աշխատանքի առաջին գլխի 3-րդ բաժնում հեղինակը անրադարձ է կատարել ՀՀ սննդարդյունաբերության ոլորտի ներդրումային միջավայրի առանձնահատուկ բնութագրիչներին:

Ատենախոսության երկրորդ՝ «Հայաստանի Հանրապետության սննդարդյունաբերությունում ներդրումային միջավայրի որակական գնահատման հիմնախնդիրները» գլխում իրականացվել է սննդարդյունաբերության ոլորտի ներդրումային ներուժի գնահատում և ներկայացվել են ներդրումային միջավայրի և ներդրումային ծրագրերի որակի վարկանիշային գնահատման մոտեցումները: Երկրորդ գլխի առաջին բաժնում իրականացվել է ՀՀ սննդարդյունաբերության ոլորտի ներդրումային ներուժի գնահատումը և ուրվագծվել են ներդրումային ներուժի բարելավման մի շարք ուղղություններ:

Ատենախոսության երկրորդ գլխի երկրորդ բաժնում ուսումնասիրվել է «Ներդրումային միջավայրի և արտաքին առևտրի փոխառնչության շրջանակը Հայաստանի Հանրապետության սննդարդյունաբերության ոլորտում»: Արտահանման և ներմուծման շարժընթացի ուսումնասիրությունը ցույց է տալիս, որ վերջին տարիներին կաթնամթերքի, մսամթերքի, հրուշակեղենի և հացամթերքի գծով արտահանում/ներմուծում համեմատության մեջ հանրապետությունում գրանցվում է բացասական սալդո: Արտահանման և ներմուծման դրական տարբերության միտում է դիտվում միայն պահածոների արտադրության գծով, որտեղ ներմուծված պահածոները կազմում են արտահանվածների մոտ 70%-ը:

Այս գլխի երրորդ բաժինը վերնագրված է «Ներդրումային միջավայրի և ներդրումային ծրագրերի որակի վարկանիշային գնահատման մոտեցումները»: Այս բաժնում իրականացվել է Հայաստանի սննդարդյունաբերության ոլորտը բնութագրող մակրոտնտեսական ցուցանիշների վերլուծություն, 10 տարիների տվյալների հիման վրա կառուցվել են դինամիկային շարքի մոդելներ և վերլուծվել են ուսումնասիրվող ցուցանիշների մեջն առկա կապերը: 2009-2018թթ. տվյալների վերլուծությունը ցույց տվեց, որ սննդարդյունաբերության ոլորտում կատարված ներդրումների ավելացումը նպաստել է արտահանված սննդամթերքի ծավալի մեծացմանը: Այս մասին է փաստում ինչպես համապատասխան ցուցանիշների աճի միտումը, այնպես էլ կոռելացիայի գործակիցը: Սննդարդյունաբերության ոլորտում

ներդրումային ուղղությունների իրականացման հիմնավորվածության գնահատման համար առաջարկվում է նաև կատարել ներդրումային ծրագրերի վարկանիշավորում, որի համար մշակվել է ներդրումային ծրագրերի վարկանիշավորման համակարգ: Ուսումնասիրությունների արդյունքում ՀՀ սննդարդյունաբերությունում ներդրումային միջավայրի առավել բարենպաստ ոլորտ է գնահատվել պահածոյագործությունը:

Ատենախոսության երրորդ՝ «Ներդրումային միջավայրի կառավարման բարելավման հիմնախնդիրների լուծման ուղիները Հայաստանի Հանրապետության ագրոպարենային համակարգում» գլխում քննարկվել են ագրոպարենային համակարգի ներդրումային ռիսկերի գնահատման և ներդրումային միջավայրի կառավարման հայեցակարգային հիմնախնդիրները: Այս գլխի առաջին բաժինը վերնագրվել է «Ագրոպարենային համակարգում ներդրումային միջավայրի կառավարման առանձնահատկությունները»: Այս բաժնում ներկայացվել են սննդարդյունաբերության ոլորտի ներդրումային ծրագրերի արդյունավետության գնահատման մոտեցումները, սահմանվել են արդյունավետության շեմեր և ուսումնասիրվել են ներդրումային միջավայրի կառավարման հիմնական գործառույթները:

Ատենախոսության երրորդ գլխի երկրորդ բաժինն ուղղված է Հայաստանի Հանրապետության սննդարդյունաբերության ոլորտի ներդրումային ռիսկերի կառավարման հիմնախնդիրների առաջադրմանը և լուծման ուղիների բացահայտմանը: Ունենալով կիրառման երկարաժամկետայնություն և պահանջելով խոշոր ֆինանսական ռեսուրսներ, ներդրումները իրենց ծավալներով հաճախ գերազանցում են նախահաշվային ցուցանիշները և դժվարություններ ստեղծում ներդրումային գործընթացի կայունությունն ապահովելիս: Ներդրումային ռիսկերի նվազեցման նպատակով առաջարկվում է սննդարդյունաբերության ոլորտում ձևավորել նաև ներկազմակերպական պահուստային ֆոնդեր, որոնք հնարավորինս կփոխհատուցեն ռիսկային վնասները: Կազմակերպության ֆինանսական կայունության տեսանկյունից նպատակահարմար է համարվում, երբ պահուստային կապիտալը կազմում է ընդհանուր սեփական կապիտալի 5%-ից ավելին: Ներդրումային գործունեության հետ կապված պահուստային կապիտալին արվող հատկացումների չափաբաժինը որոշելիս, ներդրումային ռիսկերի գնահատման հետ մեկտեղ, առաջարկվում է հաշվարկել նաև պահուստային կապիտալի և ընդհանուր պարտավորությունների հարաբերակցության գործակիցը, որը պետք է տատանվի 5-15%-ի սահմաններում՝ կախված ստանձնած

պարտավորությունների ռիսկայնության աստիճանից: Նման մոտեցմամբ հնարավորություն է ստեղծվում հաշվարկել պահուստային կապիտալի հատկացումների արժեքային մեծությունը՝ հիմնվելով պարտավորությունների գումարի վրա: Ներդրումների ռիսկայնության չափման համար առաջարկվել է նաև սննդարդյունաբերության ոլորտում ներդրումային ռիսկերի գործակցային գնահատման 4 փուլանոց մեխանիզմ:

Ատենախոսության երրորդ գլխի երրորդ բաժինը վերնագրվել է «Հայաստանի Հանրապետության ներդրումային միջավայրի կառավարման հայեցակարգային հիմնախնդիրները»: Այս բաժնում ուսումնասիրվել են սննդարդյունաբերության ոլորտում ներդրումային միջավայրի կառավարման ուղղությունները, ներդրումային միջավայրի վրա ներազդեծության ուղիները, ինչպես նաև իրականացվել է Հայաստանի պահածոյագործության ոլորտի ներդրումային միջավայրի SWOT վերլուծությունը: Հետագոտության արդյունքներն ամփոփվել են «Եզրակացություններ» բաժնում:

ԱՏԵՆԱԽՈՍՈՒԹՅԱՆ ԳԻՏԱԿԱՆ ՆՈՐՈՒՅԹԸ ԵՎ ՀԻՄՆԱԿԱՆ ԱՐԴՅՈՒՆՔՆԵՐԸ

Հեղինակի ներկայացմամբ՝ ատենախոսությունում իրականացված հետազոտությունների ու վերլուծությունների հիման վրա ստացվել է հետևյալ գիտական նորույթը.

- բացահայտվել են սննդարդյունաբերության ոլորտում ներդրումային միջավայրի վրա ազդող գործոնները, գնահատվել է ներդրումային միջավայրի վրա դրանց ազդեցության աստիճանը՝ ուղղված արդյունավետ կառավարչական որոշումների ընդունմանը,
- ներդրումային ծրագրերի իրականացման առաջնահերթությունների ընտրության նկատառումներով մշակվել է ներդրումային ծրագրերի վարկանիշավորման համակարգ,
- մշակվել է ՀՀ սննդարդյունաբերության ոլորտի ներդրումային ռիսկերի կառավարման կառուցակարգ՝ ուղղված ներդրումային ծրագրերից բխող հավանական վնասների կանխարգելմանը «գյուղատնտեսական մթերքների արտադրություն - վերամշակում - իրացում» տնտեսական գործունեության շղթայում,
- մշակվել են Հայաստանի սննդարդյունաբերության ներդրումային միջավայրի կառավարման հայեցակարգային մոտեցումներ:

Ներկայացված գիտական նորույթն բնութագրում է հետազոտության նպատակը, իսկ արդյունքները գիտագործնական առումով հիմնավորված են:

ԴԻՏՈՂՈՒԹՅՈՒՆՆԵՐ ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ

Ներդրումային միջավայրի բարելավման և օտարերկրյա ու մասնավոր ներդրումների ներգրավման հիմնախնդիրները բացահայտվել են, սակայն չեն համակարգվել և դասակարգվել: Աշխատանքում չեն նեոարվել միջազգային փորձի ուսումնասիրության արդյունքները, բացի այդ առաջարկված գործիքակազմի ընտրությունը չի հիմնավորվել:

1. Ատենախոսը ընգծում է, որ *“ներդրողների համար առաձևային խնդիր են հանդիսանում նաև իրականացված ներդրումային ծրագրերի արդյունավետության գնահատման մոտեցումները:”* Սակայն, հեղինակի կողմից ներկայացված մոտեցումները, մասնավորապես ներդրումային ծրագրերի արդյունավետության գնահատման գործակիցները հայտնի են՝ օգտագործվել են հաշվարկի չորս բանաձևեր առանց հղում կատարելու սկզբնաղբյուրի վրա (տես սեղմագրի աղյուսակ համար 4, էջ. 14 և ստենախոսության աղյուսակ համար 3.1.1 էջ. 88): Ատենախոսը ներկայացրել է առաջարկվող արդյունավետության շեմերը, սակայն չի հիմնավորել դրանք:
2. Հեղինակը օգտագործել է ցուցանիշներ, տալով դրանց լատինատառ հապավումները և հայերեն ոչ ճիշտ թարգմանությունները, մասնավորապես՝ ARR – Accounting Rate of Return (Бухгалтерская норма доходности) - Ներդրումային ծրագրի շահութաբերություն, NPV – Net present value (Чистая приведенная стоимость) – զուտ ներկա արժեք: Ատենախոսը հաշվի չի առել տվյալ ոլորտի համար կիսառեյի հետևյալ գործիքները. Microsoft Project, Open Plan Professional, Spider Project, Time Line, CA Super Project, Project Scheduler, ինչպես նաև UNIDO-ի մեթոդանաբությունը:
3. Ինչպես նշվել էր, հեղինակը անդրադարձ չի կատարել սննդարդյունաբերության ոլորտի ներդրումային միջավայրի բարելավման միջազգային փորձի ուսումնասիրությանը: Այդ համատեքստում նպատակահարմար կլիներ ատենախոսությունում ներկայացնել Եվրասիական տնտեսական միության երկրների հետ ձևավորված կապերը, ինչպես նաև անրադարձ կատարել առաջիկա ներդրումային ծրագրերի իրականացմանը և վերջիններիս ազդեծությանը Հայաստանի սննդարդյունաբերության ոլորտի ներդրումային միջավայրի վրա:
4. Օգտագործված գրականության ցանկում առկա են ուսումնական ձեռնարկներ, սակայն առկա չեն մի շարք հետազոտություններ, որոնք առնչվում են թեմայի հետ: Օրինակ. *«Հայաստանի ներդրումային միջավայրը. իրավական դաշտը և առկա*

*հիմնախնդիրները*¹ հետազոտությունում շարադրվում են սննդարդյունաբերության ոլորտի ներդրումային գրավչության բարձրացման առանցքային խնդիրները՝ արտադրանքի ցածր գնային մրցունակությունը, որի ակունքներում անարդյունավետ եւ ցածր արտադրողական գյուղացիական տնտեսություններն են²:

5. Միջազգային լավագույն փորձը վկայում է, որ կլաստերային մոտեցումը հատկապես միկրո եւ մեզո (ճյուղային, տարածքային) մակարդակներում մրցունակության բարձրացման արդյունավետ քաղաքականության հիմք է հանդիսանում: Այս առումով կարելի է ոլորտում կլաստերային ներուժի գնահատման, կլաստերային նախաձեռնությունների նույնականացման եւ խթանման, կլաստերների ձեւավորման գործընթացում մասնակիցներին խորհրդատվական, տեղեկատվական, լոգիստիկական, ֆինանսական եւ այլ բնույթի աջակցության տրամադրման կառուցակարգերի մշակումը եւ համապատասխան քաղաքականության իրագործումը: Ատենախոսությունը կշահեր, եթե վերոգրյալ հարցերի շուրջ ատենախոսը հայտներ իր մոտեցումները և հիմնավորեր առաջարկությունները:

ԵԶՐԱԿԱՑՈՒԹՅՈՒՆ

Զարմիկ Վահանի Մելիքյանի «Ներդրումային միջավայրի բարելավման հիմնախնդիրները Հայաստանի Հանրապետության սննդարդյունաբերության ոլորտում» թեմայով ատենախոսությունը ավարտուն գիտական աշխատություն է և վերոհիշյալ դիտողությունների վերաբերյալ ատենախոսի ակնկալվող բացատրությունները հաշվի առնելով չեն նսեմացնի աշխատանքի արժանիքները:


Ատենախոսության սեղմագիրը և հրապարակված հոդվածները բխում են աշխատանքի բովանդակությունից: Ատենախոսության արդյունքային դրույթները կարող են օգտագործվել հանրապետության պետական կառավարման մարմինների կողմից սննդարդյունաբերության ոլորտի զարգացման քաղաքականության իրականացման բնագավառում, ինչպես նաև գիտական հետազոտությունների և ուսումնական նպատակների համար:

¹ Հետազոտություն / Ա.Մանուկյան, Ա.Քթոյան. -Եր. Կոնրադ Ադենաուեր հիմնադրամ, 2019.- 70 էջ

² Տես՝ ՀՀ գյուղատնտեսության ոլորտում ներդրումների խթանման ուղիները. քաղաքականության բարելավման առաջարկություններ, Ագրոբիզնեսի հետազոտությունների եւ կրթության միջազգային կենտրոն, Երևան, 2017


Զարմիկ Վահանի Մելիքյանի «Ներդրումային միջավայրի բարելավման հիմնախնդիրները Հայաստանի Հանրապետության սննդարդյունաբերության ոլորտում» թեմայով ատենախոսությունն իր գիտական մակարդակով, հիմնավորվածությամբ, արդիականությամբ համապատասխանում է Հայաստանի Հանրապետությունում գիտական աստիճանաշնորհման կանոնակարգի 7-րդ կետի, ինչպես նաև թեկնածուական ատենախոսություններին ներկայացվող ՀՀ ԲՈԿ-ի պահանջներին, իսկ նրա հեղինակն արժանի է տնտեսագիտության թեկնածուի գիտական աստիճանի շնորհմանը՝ Ը.00.02 - «Տնտեսության, նրա ոլորտների տնտեսագիտություն և կառավարում» մասնագիտությամբ:

Պաշտոնական ընդդիմախոս,
տնտեսագիտության դոկտոր, պրոֆեսոր՝

 Գ. Ա. Վահանյան

Տնտեսագիտության դոկտոր, պրոֆեսոր Գրիգորի Արշալույսի Վահանյանի ստորագրության իսկությունը հաստատում եմ՝

ՀՀ ԳԱԱ Մ. Քոթանյանի անվ. ՏԻ գիտ. քարտուղար
գիտաշխատող, տնտեսագիտության թեկնածու, դոցենտ
12 հոկտեմբերի 2020թ.



Ք. Յ. Բաղդասարյան